


Dos stampia bunita pa conmemora 200 aña Fort Zoutman



ORANJESTAD (AAN): Awe 13 di Januari 1998, Servicio Postal ta emiti dos stampia special en conexion cu e di 200 aña di Fort Zoutman.

E stampianan aki lo ta obtenible na tur oficina di Post, y nan ta carga e titulo "200 years Fort Zoutman 1998".

Diseñador ta Evelino Fingal, y e denominacion di e stampianan ta 30 cent, y di 250 cent.

E stampianan a worde imprimi pa Johan Enschedé Security Printing na Haarlem, Hulanda.

Den tur dos stampia, esta di 30c y 250c, bo por mira strepinan vertical. E strepinan aki ta ripiti den tintanan bruin y blanco-preto. Den e strepinan cu tinta bruin bo por mira Fort Zoutman manera e tabata antes, mientras cu e tintanan blanco-preto ta mustro e forti den e ultimo añanan.

Tur e strepinan ta ilustra e Forti, con el a cambia atravez

di añanan. Simbolicamente e ta mostra tambe e existencia largo (pa Aruba) di Fort Zoutman. E ta un di e edificionan bieu mas preserva di Aruba. Aunke e Forti mes no a hunga un rol hopi importante den historia di Aruba, e estructura di su mes tin un balor historico.

Despues di 200 aña, Fort Zoutman keto bay ta un punto prominente den e escena di ciudad di Oranjestad.

Pa e texto riba e stampianan, colornan alegre a worde aplica en conexion cu e caracter festivo di e conmemoracion aki.

E Willem III Toren cu gradualmente a bira un parti di Fort Zoutman, originalmente no tabata pertenece na e Forti. Awendia Fort Zoutman casi ta inimaginable sin e Willem III Toren.

Fort Zoutman a worde construi na 1798, y ta e edificio di mas bieu di Aruba. El a worde construi como proteccion di e capital nobo. E Forti

aki ta haya su nomber di un admiral Hulandes, kende no tabatin nada di haber cu Aruba y ni cu e area Caribense mes. Ora cu e Forti a worde construi, tabata exactamente 15 aña despues cu Admiral Zoutman a logra di gana e convoy Britanico den Noordzee, durante e di cuatro Guera Britanico, cual hecho a worde grandemente celebra.

Ora cu el a keda cla, Fort Zoutman tabata situa na e costa y arma cu cuatro cañon. E Forti a mira accion solamente dos biaha: Na 1799 ora cu un bapor Britanico, esta "Herione" a haci preparacion pa ataca, y e Forti a preveni esaki.

Seis aña despues Aruba tabata den mannan Britanico. Pa por kita e isla di nan, tropanan for di Curaçao a baha na Spaans Lagoen. Nan a cana rumbo pa Oranjestad cu intencion di ataca e Forti di atras, unda no tin cañon. Sinembargo e Britaniconan, a logra di core cu nan door di cuminza tira usando 30 rifle.

Despues cu Aruba tabata un

biaha mas bao di regimen Hulandes na 1816, masha poco a worde haci pa su mantencion. Como un simbolo di paz, gobierno a pone 200 mata di aloë worde poni den tera dentro di e murayanan di e Forti.

E Forti a worde usa despues solamente como un bateria pa dispara saludonan. Den e ultimo cuartal di Siglo 19, algun camber a worde construi dentro di e Forti pa oficinanan di gobierno. Na 1907 el a bira cuartel di Polis y un Prison. Na 1928, e venezolanonan Rafael Simón Urbina y José María Fossi, kende a bin Aruba despues di nan intento fracasa pa tumba Presidente Juan Vicente Gómez, a pasa algun dia den Fort Zoutman.

E Toren dilanti di e Forti cu

ta forma e entrada actualmente, originalmente no tabata parti di e Forti. Na 1868 e toren aki a worde construi pa asina yuda cu e necesidad di un holoshi publico. Ora cu el a keda cla, sinembargo, no a pone ningun holoshi aden, pero a worde traha como un lighthouse. Te na 1929 a pone un holoshi aden, y e mesun aña ey e parti ariba di e toren a worde altera. E lighthouse a keda traha te na 1963, ora cu e entrada di waf parti pabao a worde habri.

E leterman W III riba e entrada, nifica Willem di Derde, e rey cu e tempo ey tabata na mando. Awendia Fort Zoutman na Oranjestad ta sede di e Musero Historico di Aruba.